



## Lewat kemuka kohort punca lambat iktiraf ijazah

**?** Saya adalah graduan pertama Ijazah Sarjana Muda (ISM) Bahasa Inggeris dan Komunikasi dengan Kepujian di Universiti Sultan Zainal Abidin (UniSZA), Gong Badak, Kuala Terengganu. Walaupun saya dan rakan tamat pengajian pada Disember 2012, kelulusan kami belum diiktiraf Jabatan Perkhidmatan Awam (JPA). Akibatnya, ada yang tidak dapat diserap masuk sebagai kakitangan kekal di jabatan kerajaan walaupun menunjukkan prestasi sangat baik dengan alasan kursus yang diambil tidak sah dan tidak diiktiraf JPA. Kami kesal kerana masalah ini tidak patut timbul dan macam mana pula dengan masa depan kami.

Kami dimaklumkan fakulti dan universiti sudah membuat prosedur bagi mendapatkan akreditasi daripada JPA dan dimaklumkan dekan serta pensyarah dari fakul-

ti itu terpaksa ‘turun naik’ dari Terengganu ke Putrajaya untuk mendapat maklum balas daripada JPA. Apakah yang menyebabkan JPA tidak mampu memberikan jawapan kepada fakulti? Kami mahu tahu bila kursus ini akan mendapat akreditasi daripada JPA? Adakah kami terpaksa mengorbankan masa depan kami?

**Fauzan Abdul Kadir**  
Bekas Pelajar  
Bahasa Inggeris dan Komunikasi  
(UniSZA).

**!** Adalah dimaklumkan bahawa permohonan pengiktirafan kelayakan daripada institusi pengajian tinggi awam (IPTA) perlu dikemukakan oleh IPT berkenaan apabila kohort pertama pelajar bagi program itu berada di tahun akhir pengajian.

Contohnya, jika tempoh pengajian lapan semester, permohonan perlu dikemukakan kepada JPA selaku urus setia apabila kohort pertama berada di semester tujuh.

Sebarang kelewatan daripada universiti mengemukakan permohonan akan menyebabkan proses permohonan kelulusan mengambil sedikit masa sebelum ia di dibawa ke dalam Mesyuarat Jawatankuasa Kecil Kelayakan Sastera dan Sains Kemasyarakatan (JKSK) sebelum dibentang dalam Mesyuarat Jawatankuasa Tetap Penilaian dan Pengiktirafan Kelayakan (JTPPK).

Berkaitan perkara yang dibangkitkan, UniSZA lewat mengemukakan permohonan pengiktirafan bagi kelayakan Ijazah Sarjana Muda Bahasa Inggeris Dengan Komunikasi (Kepujian) di peringkat akhir kohort pertama pelajar dijangka tamat pengajian. Perkara ini sudah diambil tindakan dan akan dibawa ke mesyuarat JTPPK yang dipengerusikan oleh Menteri Pendidikan, bulan ini.

**Jaafar Jantan**  
Pasukan Komunikasi  
Jabatan Perkhidmatan Awam